

■ LIA RUMANTSCHA

Valisch viandanta cun ediziuns novas da la LR

(cp) La Lia Rumantscha (LR) fa enconuschent a la magistraglia ed als scolars sias ediziuns ed ulteriurs products per las scolas rumantschas. Per quest motiv è vegnida realisada la «valisch viandanta». Actualmain viagian 28 valischs tras las regiuns rumantschas. La «valisch viandanta» cuntegna cudeschs edids da la Lia Rumantscha, da sias uniuns affiliadas e da la Chasa Editura Rumantscha. Ultra da quai porscha la valisch discs cumpacts cun paraulas e chanzuns, carnets d'OSL e gieus per la 1.–3. classa primara. La purschida exista per tut las regiuns rumantschas e las scolinas/ scolas bilinguas a Cuira e Domat.

Ina valisch per scolas ed ina per scolinas

L'emprim viadi da las 14 valischs viandantas per scolas ha cumenzà mez schaner 2015 e va a fin cun l'onn da scola, il zercladur 2015.

La fin d'avust 2015 vegnan las valischs cun autras ediziuns ed auters products puspè distribuidas en las scolas.

Ina valisch resta en media dus mais en ina scola e viagia alura vinavant tar la proxima scola.

Era per las scolinas èn 14 valischs en viadi. Er ellas cuntegnan ediziuns e products dals davos onns.



L'emprima classa da la scola primara Surses a Savognin cun la scolasta Domenica Steier (a sanester) pachetescha ora la «valisch viandanta» purtada en scola da Carmen Dedual da la Lia Rumantscha.